



Senin 23 Januari 2023

2 Korinti 11:3



"Itipu si Iblis "



Kerna si iblis melala ituriken i bas Putaka Si Badia, uga karakter ras carana erdahin. Ia nggit naki-naki alu cakap si mehuli tapi situhuna macik kal pusuhna. Iajukna enterem kalak guna ngikutken sura-surana. Tapi sura-surana e erlawanen ras sura-sura Dibata. Tempa iturikenna kata Dibata tapi ipalitkenna, gelah ula iikutken kata Tuhan e.

Bage me Perbahanen iblis man Hawa, tupung ia erdalan-dalan si sada i bas taman Eden. Reh iblis iikut-ikutna ku ja Hawa erdalan, iperdiatekenna katawari paksa si cocok mperkuanken hawa. I bas ingan si melungun, la lit teman Hawa arih, iperkuanken iblis ia. Isungkunina uga penggejapen Hawa tupung ngidah kerina tinepa Dibata. Mehuli pengaloi Hawa, iturikenna keriahen ukurna ngidah kerian si mehuli si enggo ibahan Dibata. E maka nina si iblis, kerina enda banci jadi sikerajangenndu, kam jadi seri ras Dibata, jadi si mada doni ras kerina isina. Meriah kal ukur hawa megisa sabap ia lanai terjeng singiani doni ngenca tapi jadi si mada kerina tinepa. Turah rincuhna jadi seri ras Dibata. Kerincuhenna e ieteh iblis e maka iusur-usurna naki-nakisa alu mereken pedah; nina, banci kam seri ras Dibata adi ipanndu buah batang kayu si lit i tengah peken enda. Mis itatap Hawa buah batang kayu e, mejile kal akapna, ras uga pa pe entabeh nari nge man pangan, bage i bas ukurna. Iingetna nge kata Dibata maka ula pan buah batang kayu si i tenga peken, tapi belinen sura-surana engkuasai pusuhna asangkan kata Dibata. La tertulaksa isi pusuhna, e maka ibuatna buah batang kayu e, ipanna janah iberekenna ka man perbulangenna ras pan perbulangenna ka.

Bage me beluhna iblis nami-nami manusia. Pedah man banta wari enda, metenget! Pediat sura-sura Kristus engkuasai pusuh perukuren. Ras pindo tetap gegeh Kesah Si Badia nimbak sura-sura ukurta si erlawanen ras sura-sura Dibata.

Lawanlah Iblis alu kata Dibata!



Blank lined writing area with a wavy top edge and a small notch at the bottom right.